

CONVENIO DE COLABORACIÓN ENTRE A CONSELLERÍA DE ECONOMÍA, EMPREGO E INDUSTRIA E A FEDERACIÓN DE PRAZAS DE ABASTOS DE GALICIA PARA A FINANCIACIÓN DUNHA FERRAMENTA WEB DE VENDA.

En Santiago de Compostela, a 28 de novembro de 2018, na sede da Consellería de Economía, Emprego e Industria.

REUNIDOS

Dunha parte D. _____, conselleiro de Economía, Emprego e Industria da Xunta de Galicia, nomeado para o devandito cargo polo Decreto 148/2016, de 13 de novembro, actuando en exercicio das competencias atribuídas polo artigo 34 da Lei 1/1983, de 22 de febreiro, de normas reguladoras da Xunta de Galicia e da súa Presidencia.

Doutra parte, _____, co DNI _____, actuando en nome e representación da Federación de prazas de abastos de Galicia, na súa calidade de presidente en virtude das facultadas emanadas do artigo 21 dos Estatutos, aprobados en Asemblea Xeral celebrada o 18 de setembro de 2010.

Os comparecentes, na representación que detentan, se recoñecen reciprocamente capacidade legal suficiente para o outorgamento deste convenio de colaboración, e en consecuencia,

EXPOÑEN

PRIMEIRO. A Consellería de Economía, Emprego e Industria, en adiante, a consellería, segundo o artigo 1 do Decreto 135/2017, do 28 de decembro, polo que se establece a estrutura orgánica da Consellería de Economía, Emprego e Industria, é o órgano da Xunta de Galicia ao que lle corresponde o exercicio, entre outras, de competencias en materia de comercio interior e especificamente, a promoción, fomento, modernización, desenvolvemento do comercio e a programación e xestión de axudas destinadas a estes fins, o impulso do asociacionismo comercial e da asistencia técnica comercial en colaboración con outras institucións e entidades. Concretamente, o programa 751A, que xestiona a Dirección Xeral de Comercio e Consumo, contempla a renovación do sector do comercio e a promoción de sectores e produtos galegos nun escenario onde é preciso incrementar a competitividade do comercio polo miúdo e modernizar e adecuar o comercio de proximidade co fin de que mellore a súa atracción comercial, así como adaptar os establecementos ás necesidades do usuario e que o consumidor alcance o servizo desexado.

Os mercados municipais teñen unha singular significación por constituír espazos de centralidade comercial con capacidade de xerar actividades complementarias ao seu redor, ao tempo que constitúen unha canle de comercialización moi eficaz de produto fresco derivado do mar, a horta e a gandería.

É preciso, polo tanto, adaptar estes espazos ás necesidades actuais, tanto dos comerciantes como dos consumidores para potenciar o desenvolvemento desta fórmula de distribución comercial, e que se enmarca nos obxectivos e no eido competencial da consellería. Con tal finalidade, a consellería apoia e incentiva os proxectos que xeren e fomenten a eficiencia e a modernidade do comercio galego, neste caso, por medio da iniciativa promovida pola federación de prazas de abastos de Galicia mediante a construción dunha espazo web que conte con plataforma de venda online de produtos das prazas asociadas, o que representa un paso máis no proceso de transformación dixital destes espazos comerciais que deben adaptarse á nova demanda e perfil do consumidor.

O comercio tradicional na actualidade está sometido a un profundo proceso de cambio que esixe realizar un esforzo de renovación e adaptación continuo, e mellorar a súa posición histórica que tradicionalmente veu desempeñando no desenvolvemento económico e social das nosas vilas e cidades, abríndose a novas canles de comunicación co público e de comercialización dos produtos.

SEGUNDO. A Federación de prazas de abastos de Galicia, no sucesivo, a federación, ten como obxecto a consecución de fins xerais de interese galego no seu ámbito sectorial ó que a súa denominación e fins se contraen, e entre outros, a representación, defensa e promoción dos intereses das prazas de abastos a ela asociadas, así como formular propostas e ser interlocutores perante a administración en todas aquelas accións, reformas ou medidas tendentes ó desenvolvemento, mellora e regulamento das actividades do sector.

Neste senso, o canal de venta dixital, coa posta en marcha dun espazo web con plataforma de venta on-line dos produtos das prazas asociadas así como a profesionalización da xestión do seu espazo web dentro da plataforma dos praceiros como eixos fundamentais de actuación, amósanse axeitadas perante a situación que vive este colectivo, que demanda un decidido apoio na consecución dunha maior concorrència fronte a outras estruturas comerciais, e onde as administracións públicas teñen que xogar un papel relevante. É por isto que as súas actuacións enmárcanse no interese xeral e, de acordo co disposto no artigo 26.2.a) da Lei de subvencións de Galicia, existen razóns de interese público, social, económico que xustifican a colaboración da Xunta de Galicia, a través da Consellería de Economía, Emprego e Industria, na financiación deste convenio, para a concesión dunha subvención directa de carácter singular á Federación posto que é a única organización de carácter asociativo, sen ánimo de lucro, coa que se pode levar a cabo esta actuación. O seu ámbito é de carácter autonómico, e é a asociación que aglutina á o maior número de prazas de abastos de Galicia.

TERCEIRO. Con carácter previo á sinatura deste convenio, a Federación acredita a concorrència ou non doutras axudas públicas para a mesma finalidade, de conformidade co establecido no artigo 11.d) da Lei de subvencións de Galicia. Así mesmo, constan certificacións de estar ao corrente nas súas obrigas tributarias, coa Seguridade Social e de non ter débedas pendentes por ningún concepto coa Xunta de Galicia, dacordo co establecido nos artigos 11.e) e 31.7 da devandita lei.

Por todo iso, as partes consideran que a mellora da competitividade da nosas prazas e mercados precisa, entre outros, dunha posta en valor dos recursos con que se conta para favorecer o desenvolvemento comercial, implementando as accións no ámbito da dixitalización e comercialización electrónica nas que se amosan especialmente as vantaxes competitivas do pequeno comercio de proximidade; e dado o interese coincidente da Consellería e da Federación, acordan a formalización dun convenio de colaboración conforme ás seguintes:

CLÁUSULAS

PRIMEIRA.- Este convenio ten por obxecto establecer as bases de colaboración entre a Consellería e a Federación para a **realización e xestión dunha plataforma de venta on-line**, cun orzamento total de ascende a **150.000,00 €, IVE engadido**.

A consellería comprométese a financiar o 100% do investimento con cargo á aplicación orzamentaria 09.30.751A.781.1, proxecto de investimento 2015/00254, con crédito adecuado e suficiente para financiar o presente convenio para o ano 2018. No proxecto de orzamentos para o ano 2019, inclúese a mesma aplicación e mesmo proxecto en semellantes términos e de conformidade co disposto polo artigo 19.4.c) da Lei de subvencións de Galicia, o crédito plurianual previsto no convenio terá a consideración de subvención directa, subordinando a execución do convenio na anualidade correspondente ao ano 2020 á consignación de crédito adecuado e suficiente na devandita aplicación.

A distribución por anualidades e cantidades é a seguinte:

ANUALIDADE	CONSELLERÍA DE ECONOMÍA, EMPREGO E INDUSTRIA	FEDERACIÓN DE PRAZAS DE ABASTOS DE GALICIA	TOTAL
2018	50.000,00€	0,00 €	50.000,00€
2019	50.000,00€	0,00 €	50.000,00€
2020	50.000,00€	0,00 €	50.000,00€
TOTAL	150.000,00€	0,00 €	150.000,00€

Calquera contracción do gasto que se orixine como consecuencia deste convenio deberá contar coa fiscalización previa da consellería e queda, por tanto, sometida á existencia de crédito orzamentario nos respectivos orzamentos.

Ao tratarse dun compromiso de gasto plurianual, en virtude do establecido pola Resolución do 8 de abril de 1991 pola que se fai público o acordo do Consello da Xunta de Galicia do 27 de marzo de 1991 sobre convenios de cooperación con outros entes públicos e de colaboración con particulares, é requisito previo para a subscrición deste convenio a autorización do Consello da Xunta de Galicia e, polo tanto, respectaranse as disposicións contidas no artigo 58 do Decreto legislativo 1/1999, do 7 de outubro, polo que se aproba o Texto refundido da Lei de réxime financeiro e orzamentario de Galicia.

O custo total estimado da actuación obxecto deste convenio, **realización e xestión dunha plataforma de venta on-line**, ascende a 150.000,00€, que se detalla nos conceptos sinalados no Anexo a este convenio.

SEGUNDA. A Consellería achegará o total da cantidade obxecto deste convenio, con cargo á aplicación orzamentaria 09.30.751A.781.1 “Asociacionismo comercial e servizos para pemes comerciais” do orzamento de gastos para o ano 2018, o ano 2019 e o ano 2020, subordinando a realización dos gastos aos créditos que para cada exercicio se consignen nos orzamentos da Comunidade Autónoma de Galicia.

TERCEIRA. A Federación comprométese a executar as actuacións previstas e a especificar a colaboración da Consellería en toda a documentación que delas se deriven.

Debido a que as actuacións obxecto do convenio van implicar que a Federación beneficiaria leve a cabo contratacións externas, admitirase unha contratación separada por parte da Dirección Xeral de Comercio, sempre que os obxectos dos contratos admitan fraccionamento ao ser susceptibles de utilización ou aproveitamento separado e constitúan unhas unidades funcionais independentes, ou así o esixa a natureza do obxecto. Esta previsión será comprobada polo órgano xestor no momento da xustificación de cada unha das actividades e gastos incorridos, sen prexuízo de aplicar o disposto no artigo 29.3 da Lei 9/2007, do 13 de xuño de subvencións de Galicia, tal e como se establece na cláusula quinta do presente convenio.

A subcontratación das actividades subvencionadas poderá alcanzar o 100% e regularanse polo disposto no artigo 27 da Lei 9/2007, do 13 de xuño de subvencións de Galicia, e no artigo 43 do Decreto 11/2009 do 8 de xaneiro, polo que se aproba o Regulamento da devandita lei.

CUARTA. A aportación da Consellería para a realización das actividades obxecto deste convenio é compatible con outras axudas outorgadas por outras administracións ou entes públicos ou privados, nacionais ou internacionais para a mesma finalidade, sempre que o importe total das subvencións concedidas non supere o custo das actividades subvencionadas.

QUINTA. O libramento da aportación pola Consellería levarase a cabo unha vez que a Federación acredite, mediante certificación expedida polo órgano competente, a realización das accións, e relación certificada de todos os gastos, acompañada de relación nominativa de facturas agrupadas

por cada unha das actuacións desenvolvidas coa conformidade da Dirección Xeral de Comercio, antes do 15 de decembro de cada exercicio .

As facturas e documentos xustificativos dos gastos deberán achegarse acompañados dos xustificantes de pagamento dacordo co que dispón o artigo 28 da Lei 9/2007, do 13 de xuño, de subvencións de Galicia.

Cando o importe do gasto subvencionable supere as contías establecidas na Lei 9/2017, de 8 de novembro, de contratos do sector público, para o contrato menor, a Federación deberá achegar a documentación relativa á solicitude de, como mínimo, tres ofertas de diferentes provedores, salvo que polas súas especiais características non exista no mercado suficiente número de entidades que as realicen, presten ou subministren, ou salvo que o gasto se realizase con anterioridade á solicitude da subvención; todo elo de acordo co establecido no artigo 29.3 da Lei 9/2007, do 13 de xuño de subvencións de Galicia.

A elección entre as ofertas presentadas, que deberán achegarse na xustificación, ou, se é o caso, na solicitude da subvención, realizarase de conformidade con criterios de eficiencia e economía, e deberá xustificarse expresamente nunha memoria a elección cando non recaia na proposta económica máis vantaxosa.

Así mesmo, de conformidade co disposto no artigo 11.d) da Lei de subvencións de Galicia, a Federación deberá acreditar a concorrência ou non con outras axudas públicas para a mesma finalidade.

A aportación da Consellería minorarase porcentualmente no caso de que a Federación non xustifique o orzamento total que figura na cláusula primeira.

Para facer efectivo o devandito libramento, cómpre que pola Federación se presenten certificacións de estar ao corrente nas súas obrigas tributarias, coa Seguridade Social e de non ter débedas pendentes por ningún concepto coa Xunta de Galicia.

A Consellería resérvase o dereito de solicitar toda a documentación que se considere precisa en relación coa xustificación do obxecto deste convenio. Por outra banda, a Federación queda obrigada a facilitar toda a información que lle sexa requirida pola Intervención Xeral da Comunidade Autónoma, o Tribunal de Contas e o Consello de Contas, no exercicio das súas funcións de fiscalización e control.

SEXTA. Producirase a perda do dereito ao cobramento total ou parcial da subvención no suposto de falla de xustificación do cumprimento do convenio, das obrigas contidas nestas cláusulas, das obrigas contidas no artigo 33 da Lei 9/2007, de subvencións de Galicia, ou na demais normativa aplicable, o que dará lugar á obriga de devolver total ou parcialmente a subvención percibida, así como os xuros de demora correspondentes.

O procedemento para declarar a procedencia da perda do dereito de cobramento da subvención e para facer efectiva a devolución a que se refire o punto anterior será o establecido no Título II da Lei 9/2007, do 13 de xuño, de subvencións de Galicia.

Sempre que se cumpran os requisitos ou condicións esenciais reflectidos no convenio, a Dirección Xeral de Comercio poderá apreciar un incumprimento parcial, e deberá resolver sobre o seu alcance, aplicando a mesma ponderación que tivese a condición incumprida no convenio e, se é o caso, establecendo a obriga de reintegro.

Cando se trate de condicións referentes a contía ou conceptos do investimento subvencionable, o alcance do incumprimento determinarase proporcionalmente ao gasto deixado de practicar ou aplicado a conceptos distintos dos considerados subvencionables e, se é o caso, deberán reintegrarse as cantidades percibidas na dita proporción. Con carácter xeral, se o incumprimento

superase o 65% do investimento subvencionable do proxecto, entenderase que o dito incumprimento é total, e deberán reintegrarse todas as cantidades percibidas e os seus xuros de demora.

A entidade beneficiaria da subvención regulada nestas bases seralle de aplicación o réxime de infraccións e sancións previsto no Título IV da Lei 9/2007, do 13 de xuño, de subvencións de Galicia e no Título VI do seu regulamento.

Así mesmo, toda alteración das devanditas condicións e, en todo caso, a obtención concorrente doutras axudas públicas para a mesma finalidade, poderá dar lugar á modificación das cantidades establecidas na cláusula segunda deste convenio.

As devanditas modificacións deberán formalizarse a través da correspondente addenda e someterse aos requisitos previstos no artigo 35 do Decreto 11/2009, do 8 de xaneiro, polo que se aproba o Regulamento da Lei 9/2007, de 13 de xuño, de subvencións de Galicia.

SÉTIMA. A Federación presta o seu consentimento á Consellería para que, de acordo co establecido na disposición adicional primeira do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da comunidade autónoma de Galicia para o ano 2006, publique as axudas concedidas nos rexistros públicos referidos con expresión da entidade beneficiaria, a contía e a súa finalidade, na forma que determine o órgano competente.

OITAVA.- Este convenio entrará en vigor ao día seguinte a súa sinatura, e estenderá a súa vixencia ata o 30 de decembro de 2020. Así mesmo, quedan incluídas as accións desenvolvidas dende o mes de xaneiro do ano 2018 ata o 30 de decembro de 2020, e que se correspondan co obxecto deste convenio.

NOVENA.- A subscrición deste convenio non comporta relación laboral, contractual ou de calquera outro tipo entre os profesionais que desenvolvan as actividades e a Consellería, de tal xeito que non se lle poderá esixir responsabilidade ningunha, nin directa, indirecta, nin subsidiaria polos actos ou feitos acaecidos no seu desenvolvemento.

DÉCIMA.- Coa finalidade de asegurar o cumprimento deste convenio, crearase unha comisión de seguimento de composición paritaria, que coordinará o seu desenvolvemento. A citada comisión estará presidida por un dos representantes da Consellería.

O funcionamento da comisión de seguimento farase ao abeiro do réxime xurídico dos órganos colexiados contido na sección III, do capítulo I do título I (artigos 15 e seguintes) da Lei 16/2010, do 17 de decembro, de organización e funcionamento da Administración Xeral e do sector público autonómico de Galicia.

DÉCIMO PRIMEIRA.- Este convenio resolverase por incumprimento total ou parcial dalgunha das cláusulas que o regulan, ou polo transcurso do tempo estipulado sen que se culminen as actividades acordadas.

DÉCIMO SEGUNDA.- Este convenio ten natureza administrativa e considérase incluído no artigo 6 da Lei 9/2017, de 8 de novembro, de contratos do sector público, polo que queda fóra do seu ámbito de aplicación. Non obstante, se aplicarán os principios e criterios do dito texto legal para resolver as dúbidas e lagoas que puidieran presentarse.

Este convenio rexerese, ademais do disposto no seu clausulado, pola Lei 39/2015, do 1 de outubro, do procedemento administrativo común e pola Lei 9/2007, do 13 de xuño, de subvencións de Galicia. Así mesmo, seranlle de aplicación as demais normas de dereito administrativo aplicable ou, no seu defecto, as derivadas do dereito privado. En consecuencia, correspóndelle á Consellería a prerrogativa de interpretación deste convenio e resolver as dúbidas que xurdan sobre o seu cumprimento, sendo os acordos neste senso inmediatamente executivos sen prexuízo de que se poidan interpor contra eles os correspondentes recursos contencioso-administrativos.

E, en proba de conformidade, subscríbese este convenio no lugar e data enriba sinalados, por duplicado exemplar e para un único efecto.

Pola Xunta de Galicia
O conselleiro de Economía, Emprego
e Industria

Pola Federación de Prazas de Abastos de
Galicia
O presidente

ANEXO

O custo total estimado da actuación obxecto do convenio, **realización e xestión dunha plataforma de venta on-line**, ascende cento cincuenta mil **(150.000,00 €) IVE engadido**, desglosada nas seguintes anualidades.

ANUALIDADE	CONSELLERÍA DE ECONOMÍA, EMPREGO E INDUSTRIA	FEDERACIÓN DE PRAZAS DE ABASTOS DE GALICIA	TOTAL
2018	50.000,00€	0,00 €	50.000,00€
2019	50.000,00€	0,00 €	50.000,00€
2020	50.000,00€	0,00 €	50.000,00€
TOTAL	150.000,00€	0,00 €	150.000,00€

Durante a vixencia do convenio, financiaranse a posta en marcha e xestión dun espazo web con plataforma de de venta on-line que se concreta nas seguintes actuacións, conforme ao artigo 29 da Lei 9/2007, de 13 de xuño, de subvencións de Galicia:

CONCEPTOS
Elaboración e posta en marcha da páxina web
Fotografías para os produtos da páxina
Publicidade e promoción externa do Portal/Produto
Gastos propios da xestión/mantemento do portal: coordinación, xestión marketplace, loxística e xestión do cliente (venta e servizo post-venta)
Servizo técnico permanente, dominio anual, aloxamento anual de contidos
Plans e accións Social Media: Apertura en redes sociais e xeración de contidos
Servizos de asesoramento xurídico
Deseño e elaboración do packaging de produto.